

Član 16.

Ova uredba stupa na snagu danom objavljivanja u "Službenim novinama Kantona Sarajevo".

Broj 02-05-2032-1/05
10. februara 2005. godine
Sarajevo

Premijer
mr. Denis Zvizdić, s. r.

Na osnovu čl. 22. i 24. stav 1. Zakona o Vladi Kantona Sarajevo ("Službene novine Kantona Sarajevo", broj 24/03-prečišćeni tekst), a u vezi sa članom 163. stav 1. alineja 24. Zakona o socijalnoj zaštiti, zaštiti civilnih žrtava rata i zaštiti porodice sa djecom ("Službene novine Kantona Sarajevo", br. 16/02 i 8/03). Vlada Kantona Sarajevo donijela je, na 101. sjednici održanoj 10. februara 2005. godine

UREDBU

O SUBVENCIONIRANJU TROŠKOVA GRIJANJA

Član 1.

Ovom uredbom utvrđuju se korisnici prava na subvencioniranje troškova grijanja u sezoni grijanja, uslovi, način i postupak za ostvarivanje prava, korištenje i prestanak prava, sredstva za finansiranje, nadležni organi za odlučivanje, kao i druga pitanja vezano za ostvarivanje ovog prava.

Troškovima grijanja u smislu ove uredbe smatraju se troškovi centralnog grijanja, prirodnog gasa i drugih vidova grijanja.

Član 2.

Korisnici prava na subvencioniranje troškova grijanja (u daljem tekstu: pravo na subvencioniranje) su članovi zajedničkog domaćinstva u stanju socijalne potrebe (u daljem tekstu: korisnici).

Članovi zajedničkog domaćinstva u smislu ove uredbe smatraju se podnosilac zahtjeva i članovi njegovog porodičnog domaćinstva koji zajedno sa njim žive i stanuju.

Član 3.

Korisnici iz člana 2. stav 1. ove uredbe su:

1. domaćinstva čiji ukupan prihod po članu domaćinstva ne prelazi iznos od 70,00 KM mjesečno,
2. jednočlana domaćinstva penzionera čiji ukupan prihod ne prelazi iznos od 165,00 KM mjesečno,
3. dvočlana domaćinstva penzionera čiji ukupan prihod ne prelazi iznos od 220,00 KM mjesečno,
4. domaćinstva u kojima su jedan ili više članova korisnici novčane naknade za pomoć i njegu od strane drugog lica, koja imaju binauralni gubitak sluha od 95-100% po Fowler-Sabine, a čiji ukupan prihod po članu domaćinstva ne prelazi iznos od 120,00 KM mjesečno,
5. domaćinstva u kojima je jedan od članova 100% - tni invalid - paraplegičar, bez obzira na prihod po članu domaćinstva.

Član 4.

Ukupan prihod domaćinstva kao osnov za ostvarivanje prava po ovoj uredbi čine prosječni mjesečni prihodi članova zajedničkog domaćinstva ostvareni u prethodnoj godini.

Prihodi iz stava 1. ovog člana su:

1. plaće i druga primanja iz radnog odnosa,
2. starosne, invalidske i porodične penzije,
3. prihodi od poljoprivredne djelatnosti,
4. primanja po propisima iz invalidsko - boračke zaštite i zaštite civilnih žrtava rata,
5. prihodi ostvareni po osnovu imovinskih prava,
6. prihodi ostvareni po osnovu autorskih prava,
7. prihodi ostvareni po osnovu privrednih, uslužnih i drugih djelatnosti.

Član 5.

Pravo na subvencioniranje imaju korisnici iz člana 3. ove uredbe, pod slijedećim uslovima:

1. da je jedan od članova domaćinstva nosilac stanarskog prava na stanu koju koristi domaćinstvo, vlasnik ili vanknjižni vlasnik stambene jedinice koju koristi domaćinstvo, nosilac privremenog rješenja ili odobrenja za smještaj izdatog od strane nadležnog organa, podstanar koji je zaključio ugovor o podstanarskom odnosu u stambenoj jedinici koju koristi domaćinstvo, a koji je ovjeren u Poreskoj upravi nadležne općine,
2. da ukupna stambena površina za jednočlana domaćinstva ne prelazi 44 m², a za višečlana domaćinstva za svakog slijedećeg člana ova površina se uvećava za 10 m² stambene površine, izuzev domaćinstva čiji su članovi korisnici stanova za socijalne kategorije u objektima O-9 i O-10 na lokaciji "Otes" i domaćinstva iz člana 3. stav 1. tačka 5. ove uredbe,
3. da nisu domaćinstva u kojima je neko od članova vlasnik preduzeća, samostalne radnje ili obavlja registrovanu dopunsku djelatnost,
4. da nisu domaćinstva u kojima neko od članova izdaje pod zakup stambene jedinice,
5. da nisu domaćinstva u kojima je jedan od članova korisnik stalne novčane pomoći,
6. da nisu domaćinstva u kojima je jedan od članova vlasnik putničkog ili drugog motornog vozila.

Odrebe stava 1. tačke 6. ovog člana ne odnose se na lica, koja u skladu sa Zakonom o carinskoj politici BiH ("Službeni glasnik BiH", br. 21/98 i 10/02) mogu ostvariti pravo na oslobađanje carine pri uvozu putničkog ili drugog automobila kao ortopedskog ili drugog pomagala.

Član 6.

JU "Kantonalni centar za socijalni rad" Sarajevo (u daljem tekstu: JU Kantonalni centar) -Služba socijalne zaštite (u daljem tekstu: Služba) domaćinstvima rješenjem priznaje pravo na subvencioniranje jedne vrste energenta iz člana 1. stav 2. ove uredbe, za pet mjeseci u kalendarskoj godini (januar, februar, mart, novembar i decembar).

Ministar za rad, socijalnu politiku, raseljena lica i izbjeglice Kantona Sarajevo (u daljem tekstu: ministar) će posebnim podzakonskim aktom utvrditi visinu mjesečnog novčanog iznosa prema planiranim i raspoloživim sredstvima iz Budžeta, o čemu se neće donositi posebno rješenje.

Član 7.

Za korisnike koji ostvare pravo na subvencioniranje centralnog grijanja ili prirodnog gasa JU Kantonalni centar će doznačavati novčana sredstva mjesečno prema ispostavljenim fakturama javnim preduzećima "Sarajevogas" i "Toplane" Sarajevo, koji vrše naplatu, a za korisnike koji ostvare pravo na subvencioniranje ostalih vidova grijanja, novčana sredstva će se isplaćivati putem pošte na adrese korisnika.

Član 8.

Zahtjev za ostvarivanje prava na subvencioniranje podnosi se Službi prema mjestu prebivališta ili boravišta podnosioca zahtjeva, koja u upravnom postupku odlučuje o zahtjevu.

Član 9.

Protiv rješenja Službe može se izjaviti žalba Ministarstvu za rad, socijalnu politiku, raseljena lica i izbjeglice Kantona Sarajevo (u daljem tekstu: Ministarstvo).

Član 10.

Način podnošenja zahtjeva i vođenja evidencije propisat će ministar posebnim Uputstvom.

Član 11.

Lica koja prvi put podnose zahtjev za ostvarivanje prava na subvencioniranje, dužna su uz zahtjev pribaviti i priložiti slijedeću dokumentaciju (originale ili ovjerene fotokopije):

1. kućnu listu (dokaz: izjava ovjerena od strane nadležnog organa),
2. potvrdu o prihodima za sve članove domaćinstva (dokaz: potvrda izdata od strane nadležne institucije),
3. ličnu kartu,
4. prijavnicu o mjestu prebivališta ili boravišta za sve članove domaćinstva (izdata od nadležne policijske uprave),
5. rodni list (za djecu do 18 godina),
6. potvrdu o redovnom školovanju (za lica starija od 18 godina),
7. račun za centralno grijanje ili prirodni gas,
8. dokaz o vlasništvu ili vanknjižnom vlasništvu stambene jedinice (zemljišnoknjižni izvadak, katastarski izvadak, darovni ugovor ili ugovor o kupovini stambene jedinice ovjeren od strane nadležnog suda, građevinska dozvola, potvrda od nadležnog organa općine da je podnesen zahtjev za legalizaciju bespravno izgrađene stambene jedinice, zahtjev upućen Općinskom sudu Sarajevo za pokretanje ostavinskog postupka vezanog za stambenu jedinicu koju koristi neko od zakonskih nasljednika).

Član 12.

Službe će po službenoj dužnosti od nadležnih organa pribavljati relevantne dokaze za ostvarivanje prava na subvencioniranje, kako slijedi:

1. Porezna uprava-kantonalni ured (evidencija poreskih obveznika),
2. Služba za rad, socijalna pitanja, zdravstvo, izbjeglice i raseljena lica općina (evidencija korisnika prava po osnovu zaštite civilnih žrtava rata),
3. Služba za oblast boračko-invalidske zaštite (evidencija korisnika boračko-invalidske zaštite),
4. Nadležna općinska služba za prihode,
5. Policijska uprava (evidencija vlasništva putničkog ili drugog motornog vozila),
6. JU "Služba za zapošljavanje Kantona Sarajevo" Sarajevo (evidencija nezaposlenih lica).

Član 13.

Za korisnike kojima je u prethodnoj godini priznato pravo na subvencioniranje, službe će do 30.08. tekuće godine okončati postupke provjere dokaza iz dokumentacije spisa, radi utvrđivanja uslova za dalje ostvarivanje prava na subvencioniranje troškova grijanja.

Korisnici su dužni da dostave dokaze iz člana 11. stav 1. tač. 1., 2. i 6. do 30.06. tekuće godine, o čemu će biti obaviješteni javnim saopštenjem.

U roku iz prethodnog stava ovog člana, službe će pribaviti dokaze iz člana 12. ove uredbe po službenoj dužnosti.

Član 14.

Ukoliko korisnici u roku iz člana 13. stav 2. ne dostave potrebne dokaze ili se u postupku provjere dokumentacije utvrdi da ne ispunjavaju uslove za nastavak ostvarivanja prava na subvencioniranje, istim ovo pravo prestaje o čemu službe donose rješenje.

Za one korisnike koji i dalje budu ispunjavali uslove za ostvarivanje prava po ovoj uredbi se neće donositi nova rješenja.

Član 15.

Korisnici su dužni prijaviti svaku nastalu promjenu koja je od uticaja za ostvarivanje ovog prava u roku od 15 dana od dana nastanka promjene.

Ukoliko Služba utvrdi da nije postupljeno u skladu sa stavom 1. ovog člana, korisnicima prestaje utvrđeno pravo i prema istim će se pokrenuti odgovarajući postupak kod nadležnih organa u skladu sa važećim zakonskim propisima.

Član 16.

Sredstva za realizaciju ove uredbe i troškova postupka obezbjeđuju se u Budžetu Kantona Sarajevo.

PRELAZNE ODREDBE

Član 17.

Korisnici koji su ostvarili pravo na subvencioniranje po propisima koji su važili do dana primjene ove uredbe nastavit će ostvarivanje tog prava do postupka provjere dokumentacije iz člana 13. ove uredbe.

Za korisnike iz stava 1. ovog člana, nakon provjere dokumentacije u 2005. godini donijet će se nova rješenja, a za svaku sljedeću godinu postupat će se u skladu sa čl. 13. i 14. ove uredbe.

Postupci koji su pokrenuti po zahtjevu za ostvarivanje prava na subvencioniranje prije početka primjene ove uredbe, okončat će se po propisu koji je povoljniji za podnosioca zahtjeva.

Član 18.

Ova uredba stupa na snagu danom donošenja i objavit će se u "Službenim novinama Kantona Sarajevo" a primjenjivat će se od 01. 01. 2005. godine.

Broj 02-05-2032-2/05
10. februara 2005. godine
Sarajevo

Premijer
mr. Denis Zvizdić, s. r.

Na osnovu čl. 22. i 24. stav 3. Zakona o Vladi Kantona Sarajevo ("Službene novine Kantona Sarajevo", broj 24/03 - prečišćeni tekst), a u vezi sa članom 4. tačka 2. Zakona o ministarskim, vladinim i drugim imenovanjima Federacije Bosne i Hercegovine ("Službene novine Federacije BiH", br. 12/03 i 34/03), na prijedlog ministra stambenih poslova, Vlada Kantona Sarajevo donijela je, na 100. sjednici održanoj 3. februara 2005. godine

RJEŠENJE

I

DŽEVAD KADRIBEGOVIĆ, dipl.ing.arh., imenuje se za direktora Kantonalnog stambenog fonda Sarajevo na period od 2 mjeseca.

II

Ovo rješenje stupa na snagu 03.02.2005.godine i objavit će se u "Službenim novinama Kantona Sarajevo".

Broj 02-05-1547-10.2/05
3. februara 2005. godine
Sarajevo

Premijer
mr. Denis Zvizdić, s. r.

Na osnovu čl. 22. i 24. stav 3. Zakona o Vladi Kantona Sarajevo ("Službene novine Kantona Sarajevo", broj 24/03 - prečišćeni tekst), Vlada Kantona Sarajevo donijela je, na 100. sjednici održanoj 3. februara 2005. godine

RJEŠENJE

I

Razrješava se KASIM ZULUM, dipl.ing.grad., dipl.ecc., dužnosti direktora Kantonalnog stambenog fonda Sarajevo, na lični zahtjev.